



**COLLECTIVITE TERRITORIALE DE CORSE
ASSEMBLEE DE CORSE**

1^{ère} SESSION ORDINAIRE POUR 2016

REUNION DES 14 ET 15 AVRIL

N° 2016/O1/021

**RIPOSTA DI M. Saveriu LUCIANI A A DUMANDA A BOCCA DI
M. Paul-André COLOMBANI
A NOME DI U GRUPPU « FEMU A CORSICA »**

OBJET : Risorse in acqua per u Meziornu Stremu

O Sgiò Presidente, o sgiò Cunsiglieri, Caru amicu,

A vostra dumanda palesa una primura maiò, à livellu di e risorse in acqua di u nostru paese, è più largu chè cusì, in sta situazione di riscaldamentou climaticu propiu incertu chi tocca u Mediterraniu.

Tandi, si capisce bè ch'ellu hè sopr'à tuttu un quistiunamentu legittimu, moltu più per un'elettu di sta regione di u Meziornu Stremu.

Sappiate chì a vostra regione hè appruvistata d'estate, da dui matrali, quellu di U Spidali, d'una capacità di trè milioni è trecentu mila metri cubi è quellu di Talza, in Figari, cù cinque milioni è sette centu mila metri cubi.

Un passu in daretu per divvi ch'un hè piossu tantu d'auturnu è d'inguernu. Cunsequenze negative : à mezu ferraghju eramu si pò di à chì feremu, cù poc'acqua à U Spidali è solu 40 per centu in Figari. Avete forse rimarcatu chì à listessa epica, avia indiatu unepoche d'azzione, à titulu cunservatoriu :

- Prima, a mubbilisazione specifica di l'agenti di l'Offiziu d'Ecchippamentu Idrolicu di Corsica, da ch'elli fianu un seguitu cuntinuvu di tutti i retali, da riduce e perdite o puru l'arrubbecciu.

- Dopu, aghju fattu riunione d'infurmazione cù l'agricultori, nant'à u situ di u matrale di Talza, è, u 24 di ferraghju, cù tutti l'eletti di a Cumunità di Cumune di u cusì dettu « Sud Corse » in Purtivechju. Dipoi, i servizii prefetturali si sò puru messi in ballu.
- Aghjustemu ch'in lu frattempu avia dumandatu u 18 di Ferraghju à u Prefettu, una derugazione per fà passà per anticipazione a presa di l'Asinua da l'addebitu riservatu inguernale (cinquanta litri à seconda) à l'addebitu riservatu statinale, vale à dì à quattordeci litri à seconda.
Sappiate ch'è u U Spidali cù l'acqua di l'Asinau.

Dipoi tandu, ancu di grazia, hè piossu è puru nivatu à pena ancu quaiò, per u più à l'entre marzu. A situazione hà pigliatu capu bonu, di manera significativa, postu ch'è oramai U Spidali hè pienu à settanta cinque per centu, sia dui milioni è mezu di metri cubi, è Figari ghjunghje à basi novanta per centu, sia cinque milioni è trecentu mila metri cubi.

In logica, vole di ch'ellu ci seria micca risicu di scarsità per chist'annu, s'omu hè ragiunevule. Averia da firmà circa un milione è trecentu mila metri cubi per mezu'ottobre ch'è vene.

Ma puru, ci vole à fà casu ch'è s'ella vene impurtante a cunsumazione, ch'è sapete bè ch'è più cala a risorsa è più cala a qualità fisicachimica di l'acqua, sopr'à tuttu in Figari. D'altronde, s'ellu si viota u Spidali troppu in furia, un si puderà assicurà un'alimentazione cumpletta, solu à partesi da Figari.

Per faccila corta, ci tocca à fà casu, ch'è u veranu ripiglia a suprana è pare di più in più caldu.

Per contu nostru, o sgiò cunsigliu, vi possu di ch'è l'Offiziu hà travagliatu in u sensu di a migliurazione di a situazione, fendu unepochi d'investimenti :

- Per indettu u rimpiazzamentu di tante canalizzazione difettose o vechje, è u sviluppu currelativu di a debbimetria, à u scopu di cresce a rendita in tutti i retali. Sappiate ch'è aspetta quantunque un bellu cartulare d'un milione è mezu, vutatu in lu 2013, aspetta sempre u finanziamentu di u PEI per cuntinuà sti travaglii.
- Ci hè dinò l'opera indiate di migliurazione di i trasferimenti da garantisce per esempiu l'alimentazione cumpletta di a stazione di Nota, à partesi da u matrale di Figari. Ch'è vole di ? a custruzione d'un surpressore in Campiccioli è parechji chilometri di canalizzazione in 600; Dinò quì, s'ò operazione previste in u quattu di a terza convenzione d'applicazione di u PEI.

Per compie, vi ricordu ch'è n'avemu abbuccatu una cuoperazione cù a Sardegna, nant'à e problematiche di l'acqua in u Mediterraniu, è appruntemu una convenzione cù l'Università di Corsica, primurosi ch'è no simu di sviluppà a ricerca in sti tempi incerti di riscaldamentu climaticu.

Per cunclude è davvi infine un'antra strada ch'è no circhemu à apre, vi diceraghju ch'è a securisazione di a pruvista in acqua di u Meziornu Stremu seria di realizà un'antru matrale, forse nant'à u Cavu, ch'è custeria circa sessanta milioni d'euri. Qu'è ci

vuleria un sforzu tamantu, chì, a sapemu bè, stu PEI ùn basterà manc' à pena à stabilizà a situazione generale per sti vint'anni à vene.

In tantu, per ciò chì tocca stu prugettu di matrale nant' à u Cavu, avemu principiatu i studii, ch'ellu ci vuleria à finisce è chì sò, elli, previsti in u quattru di sta terza cunvenzone di u PEI.

Eccu, o sgiò cunsiglieru, per risponde à i vostri pensieri. Siate persuasu chì l'Offiziu d'Ecchippamentu Idrolicu di Corsica dà capu è derà sempre capu à e vostre primure cù tutta a so forza è e so cumpetenze, per a vostra regione, ma ancu per l'altre regione di st'isula.

À ringraziavvi.